

## صحوة

ولقتني بلم ف عمري الضايح مني

سنيين وسنيين

وبابص لفوق ويا التيهيين!

فالقيت السما ضحكالي !!

إزاي؟!

إزاي ضاع منها اللون الغامق

الغامق جدا جدا

إلي اتعودنا عليه؟!

ولقتني بابص بشوق

علي كل مكان في الارض

بعيون مليانه ربيع

انا فين؟

انا ايه؟

جري ايه؟!

وبحب بقول للعمر " استوب "

استنتي شويه عليه  
خليني أشوف بعنيه  
الدنيا الجايه ازاي !  
بعد الفوقان م التوهه  
بعد التتويم والغربه  
والذل الجارح يا.....ه  
ايه بعد التغييب ؟  
بعد التغير ؟  
بعد التحرير  
ايه ؟  
لولاد ماعادوش لولاد  
وشداد  
بالطول والعرض  
خادوها مداد  
عدونا الخوف الساكن فينا  
بطول ليام

وقالولنا نشوف الدنيا  
في قلب عنيهم نور  
فتحوا الابواب  
سجنوا البواب  
وقالولنا ندوس ع الصعب  
ونجري نصحي العمر النائم  
يا.....ه  
بقي دول لولاد ؟  
اولاد النت  
الواد.....والبت  
ياما قولنا عليهم ياما  
واتاري اولاد النت  
دايرين لي علي الفيس بوك  
قالبين الدنيا بجد  
من غير مايقولوا كلام  
قلبوا الموازين في الارض

من بعد مامات فينا الاحساس

عبونا حماس

ورفعنا

الراس

ياولاد الايه !!

شيلتم وزارات

جبتم وزارات

حتي الدستور!

داستور ياولاد

صحيتوا الكون

من بعد غياب

من بعد رقاد

جبتولنا العيد

من غير مواعيد

من دم شهيد

.....كملوا ياولاد .